

四庫全書

經部

欽定四庫全書

經部

論語類考卷五至

詳校官給事中臣戴璐

刑部郎中臣詩兆椿覆勘

總校官知縣臣楊懋珩

校對官助教臣卜維吉

謄錄監生臣茅琳

欽定四庫全書

論語類考卷五

明 陳士元 撰

官職考

冢宰

馬融氏曰冢宰天官卿佐王治者

朱子曰冢宰大宰也

元按殷制建官先六太一曰太宰無冢宰之名杜佑

通典云太宰於殷為六太於周為六卿亦曰冢宰蓋
周武王既黜殷命參考殷官始改太宰為冢宰夫高
宗殷君而孔子曰聽於冢宰者舉周官之名耳冢宰
太宰周通稱也周禮云乃立天官冢宰使帥其屬又
云太宰卿一人鄭玄註云冢大也宰官也百官總焉
謂之冢列職於王則稱大陸德明註云宰調和膳羞
之名此冢宰亦能調和衆官故號大宰柯尚遷註云
冢山頂也大也宰主也制也謂所主制者大也兼衆

說而冢宰之義明矣

大宰

孔融氏曰太宰官名或吳或宋未可知也

吳程氏曰左傳魯鄭楚諸國皆有是官不但吳宋也
金履祥氏曰天子之宰曰太宰宋王者之後吳僭王
故當時其宰亦稱太宰

元按鄭玄邢昺皆以太宰為吳蓋據左傳哀公十二年公會吳于橐臯吳子使太宰嚭請尋盟又子貢嘗

適吳知太宰詬之為人今越絕書詳載其語故鄭邢
以為吳太宰也然洪興祖則以為宋蓋據列子仲尼
閒居篇商太宰見孔子有丘聖者歟之問也又王柏
云觀知我少賤之辭宜是宋而金履祥亦云夫子本
宋人雖居魯而娶於宋又嘗長居宋則是太宰素知
其少長之事也若然則太宰當屬宋但姓名無考耳

百官

馬融氏曰已謂百官

元按百官之數孔子槩言之耳非真以百計也周書云唐虞稽古建官惟百是唐虞以前亦當有百官矣明堂位云有虞氏官五十而鄭玄杜佑則以唐虞之官止有六十說者乃謂唐虞官多兼攝豈二典登百工宅百揆之言不足信乎又孟子謂堯使百官事舜於畎畝之中况舜踐帝位安得而無百官也禮記云夏后氏官百然以三公九卿二十七大夫八十一元士計之則一百一十有七故鄭杜皆云夏官一百二

十周書又云夏商官倍謂倍唐虞也數當二百故明
堂位云殷官二百而鄭杜皆以殷官二百四十王制
又以殷周內官皆二千六百四十三人所謂內官者
天子之官非侯國之官也夫三代官數後儒往往各
記其傳聞故參差不同如此若考周禮官數公三人
卿二十四人中大夫六十八人下大夫二百九十三
人上士一千一百三十三人中士四千五百三十六
人下士一萬九千二百九人共計二萬五千二百六

十六人其數又豈止於百而已哉然周禮太宰之文則多稱百官其掌邦之六典則曰禮典以統百官政典以正百官刑典以刑百官事典以任百官其祀五帝則曰掌百官之誓戒其作大事則曰戒於百官贊王命其計吏治則曰歲終詔王廢置百官是百官之聽於冢宰不獨天子諒陰之時為然也夫周禮官不止於百而多稱百官滕國至小而世子亦曰父兄百官然則百官之稱乃古今之常語而唐虞三代之建

官豈必膺合乎百數而後謂之百官哉

公卿

元按禮記虞夏商有師保有疑丞設四輔及三公不
必備惟其人言使能也天文三台以三公法焉伊尹
曰三公調陰陽九卿通寒暑周成王作周官云立太
師太傅太保茲惟三公少師少傅少保曰三孤杜佑
謂三太為周之三公而三少孤卿與六卿為九焉周
禮建外朝之法以左九棘為孤卿大夫之位面三槐

為三公之位其典命則三公八命卿六命王制云天
子三公九卿又云大國次國三卿小國二卿是侯國
有卿而無公自周衰官失而百職淆亂侯國邑宰亦
稱公矣孔子正名分其曰出則事公卿者非謂魯臣
之公卿也蓋稱魯君為公而魯臣為卿耳又周禮地
官二鄉公一人每鄉卿一人是謂鄉官有爵秩而無
官府孔子所謂公卿者豈指是耶

上大夫下大夫

元按王制上大夫卿又云大國次國三卿小國二卿皆下大夫又云次國之上卿位當大國之中中當其下下當其上大夫小國之上卿位當大國之下卿中當其上大夫下當其下大夫是王制未嘗言中大夫也而周禮六官之屬則有卿有上大夫中大夫下大夫豈天子之大夫有三等而侯國乃無中大夫耶所謂大國三卿者謂立司徒兼冢宰之事立司馬兼宗伯之事立司空兼司寇之事故春秋左傳云季孫為

司徒叔孫為司馬孟孫為司空是三卿也以此推之
成周之制侯國未嘗特立冢宰宗伯司寇之官其有
此官乃侯國之僭設耳魯之三家為三卿是皆上大
夫之職而孔子仕魯自下大夫為上大夫閭閻侃侃
之言其當為下大夫之時乎

司敗

孔融氏曰司敗官名

朱子曰司敗即司寇也

元按左傳文公十一年楚子西曰臣歸死於司敗杜預註云陳楚名司寇為司敗周禮秋官司寇鄭玄註云寇害也掌刑者謂之司寇亦謂之司敗是刑所以禁其敗類者而已陳改司寇為司敗避太子禦寇之諱猶晉以僖侯改司徒為中軍宋以武公改司空為司城也

士師

孔融氏曰士師典獄之官

金履祥氏曰古者民頗少學而習文史有才能者謂之士獄官民之司命故以士為之其長則為士師後世遂以獄官為士師

王柏氏曰刑官曰士其長曰師故周禮士師之下有鄉士遂士縣士方士訝士皆掌獄詞者

元按尚書舜命臯陶曰女作士穆王訓刑曰士制百姓於刑之中是古之刑官惟稱士而已周立大司寇乃以士稱屬官故周禮刑官之屬曰士師下大夫四

人而士師之職則掌五禁之法五戒之用鄉閭什伍
追胥之事又掌官中之政令與士之八成凡凶荒獄
訟祭祀賓客軍旅之會無不賴其訓約其職非不重
且嚴也自周衰法弛司寇專恣而士師之職始輕如
蚘蠹辭靈立而請士師則士師在邑宰之下官小可
知矣孟子謂柳下惠不卑小官為其三任士師也惠
因刑罰不中當屢有諫諍其致三黜也亦宜然孟氏
使陽膚為士師者何也蓋孟氏在魯以司空兼司寇

之任士師乃其所屬耳魯子所謂得情勿喜其亦以
士師禁戒之法未明於當時乃以告於門弟子憫愚
民而警孟氏與

小相

朱子曰相贊君之禮者言小亦謙辭

元按周禮秋官司儀職云掌九儀之賓客擯相之禮
以詔儀容辭令揖讓之節鄭玄註云出接賓曰擯入
贊禮曰相司儀職又云凡諸公相為賓及將幣交擯

三辭車逆拜辱賓車進答拜三揖三讓每門止一相
鄭玄註云相謂主君擯者及賓之介也謂之相者於
外傳辭耳入門當以禮紹侑也介紹而傳命者君子
於其所尊不敢質敬之至也每門止一相彌相親也
大宗伯職云朝覲會同則為上相聘禮云卿為上擯
大夫為承擯士為紹擯玉藻云君入門介拂闌大夫
中闌與闌之間士拂棖是卿為上介大夫為次介士
為末介也赤之願為小相者謙不敢為上擯上介之

卿願為承擯紹擯次介未介之大夫士耳

使擯

朱子曰擯主國之君所使出接賓者

汪炎昶氏曰周禮行人上公九介侯伯七介子男五介各隨其命數賓次於大門之外主人使擯者出而請事主國之君公則擯者五人侯伯四人子男三人各用其命數之強半下於賓以示謙也若其傳命之制賓立於庫門之外即大門直闌西北面介者以次

立於西北東面每介相去三丈六尺主君出接立於庫門之外直闌西南面擯者以次立於君之東南西面每擯相去亦三丈六尺末擯與末介相對東西亦相去三丈六尺主君命上擯請問來故蓋雖知其來朝不敢自許其朝已恐其或為他事而來所以示謙也上擯受君命而傳之承擯逆遷傳至末擯末擯傳至末介以次繼傳上至於賓賓命上介復命復以次傳之擯而達於主君然後主君進而迎賓以入

元按古者諸侯相見之禮賓主各有副賓副曰介主
副曰擯上公之禮介九人擯五人朝位賓主之間九
十步侯伯介七人擯四人賓主之間七十步子男介
五人擯三人賓主之間五十步諸侯之卿相見各下
其君二等謂如公之卿則七介侯伯卿五介子男卿
三介則擯亦半之其大夫又下於卿二等邢昺云賓
若是公來至門外直當闈西去門九十步而下車當
軹北嚮而立九介立在君之北迤邐西北並東嚮而

列主君出直闌東南嚮立擯在主人之南迤邐東南立並西嚮末擯與末介相對中間相去三丈六尺主君問賓來意傳言於上擯歷次擯至末擯傳末介歷次介上介至於賓賓答來意則自上介漸歷次介末介及末擯至上擯告於主人然後迎賓至門若使者來聘則主君至大門不出限南面而立不傳命上擯進至末擯間南揖賓賓亦進至末介間上擯揖而請事入告君君在限內乃相與入也凡門外列擯介皆

在主賓之前及入門則擯介皆隨主賓之後賓退必復命曰賓不顧矣蓋賓退主人送出門外設兩拜賓更不顧而去國君於列國之卿大夫亦然

令尹

朱子曰令尹官名楚上卿執政者也

元按邢昺云令尹宰也蓋周禮六官以冢宰為長楚改宰為令尹遂以令尹為上卿之號然楚人從他國之言或亦謂之宰左傳宣公十二年為敖為宰是也

令善也尹正也言用善人正此官也子文三仕為令尹左傳莊公三十年子文為令尹至僖公二十三年子玉為令尹二十八年子玉死薦呂臣為令尹三十年子文上為令尹其後子文死左傳乃書曰令尹子文卒闞般為令尹是子文死時尚為令尹死後乃闞般繼之耳子玉之為令尹也子文先為之治兵子玉呂臣子上之間子文蓋執其政以代其缺故有三仕三已之說

宰臣老

朱子曰宰邑宰家臣之通號

元按邑宰之稱取其主制一邑之事千室之邑有邑
宰百乘之家有家臣皆謂之宰古之邑宰不必限以
千室天子畿內提封萬井當有八百萬家合千室而
置一邑則有八千邑邑設一宰似為太繁季本氏乃
謂古之置宰多由民所推其俸祿皆民自給不與於
天子設官之數家臣亦然觀原思為宰而孔子與粟

九百蓋自分其祿以食家臣也殊不知家臣邑宰之祿皆其邑之所自出孔子為司寇必有采邑故以原思為邑宰即當食其邑九百之粟非分已九百之祿以食家臣也杜佑氏云周官有縣正各掌其縣之政令而賞罰之春秋之時列國相滅多以其地為縣則縣大而郡小故傳謂上大夫受縣下大夫受郡汲冢周書作雒篇亦曰千里百縣縣有四郡是縣大於郡矣縣邑之長有宰有尹有公有大夫之名魯衛曰宰

楚曰公曰尹晉曰大夫其職一也沈諸梁為葉尹而稱葉公猶閔班為申尹而稱申公皆僭稱耳子游為武城宰子夏為莒父宰子路使子羔為費宰皆謂之邑宰費雖季氏私邑然采地之公田在焉其實亦邑宰也若夫仲弓為季氏宰原思為之宰公叔文子之臣子路使門人為臣孟公綽為趙魏老則皆家臣也夫趙魏不稱臣而稱老朱子註云老家臣之長然有長必有佐豈晉卿家大其家臣固非一人所能任而

公綽之才獨優於為老乎

封人

朱子曰封人掌封疆之官

元按周禮封人掌為畿封而樹之鄭玄云畿上有封
若今時界也邢昺云天子封人職掌封疆則知諸侯
封人亦然莊子云驪之姬艾封人之子也左傳潁谷
封人祭仲足為祭封人宋高哀為蕭封人夫潁谷祭
蕭皆國之邊邑故知封人職典封疆也然周禮又有

掌疆之官列在掌固司險二官之後其職皆典封疆而封人之職則重在設社壇造都邑九祭祀喪紀并賓客軍旅之盟惟飾牛牲而已其曰九封國封其四疆謂其封建如此非謂其守封也故封人屬於司徒掌疆屬於司馬亦以國有大故及用兵之時掌疆乃其所急耳然春秋封人皆在邊邑實掌疆之職豈成周之初以封人分疆其後遂以為掌疆抑掌疆之官別有設與

行人

朱子曰行人掌使之官

元按周禮秋官有大行人小行人皆大夫也掌諸侯朝覲宗廟會同之禮儀及時聘會同之事則諸侯之行人亦然

晨門

邢昺氏曰晨門掌晨昏開閉門者謂閽人也

朱子曰晨門掌晨啓門

元按周禮有司門司關之官王畿千里王城在中城之四面各三門共十二門以司門掌之其五百里界首每面置三闕亦十二闕以司關掌之鄭玄註云闕界上之門是已司門之職則曰掌授管鑰以啓閉國門凡四方之賓客造焉則以告司關之職亦曰凡四方之賓客叩闕則為之告是亦授管鑰以啓閉關門者列國皆有門有關石門在齊之界上是亦闕也晨則啓門昏則閉門本一人之職謂之晨門者以子路

宿於石門次晨出闕遇司闕者啓門乃相為問答耳

太師 少師 師

何晏氏曰大師樂官名

邢昺氏曰大師猶周禮之大司樂也又曰大師樂官之長

朱子曰少師樂官之佐

元按周禮大司樂中大夫二人樂師下大夫四人鄭玄註云大司樂樂官之長也又有大師下大夫二人

小師上士四人鄭玄註云樂用瞽矇命其賢智者為
大師小師杜蒯以曠為大師是也竊謂大師小師專
掌音樂之官謂之師者以其賢智而知音可以教其
屬也小師即少師而孔子獨與大師論樂者豈大司
樂之官惟天子得設而列國止以大師為樂官之長
耶大師之職掌六律六同以合陰陽之聲又執同律
以聽軍聲而詔吉凶小師之職掌教鼓鼗祝敔塤簫
管絃歌凡喪祭饗饗皆從大師而已師冕不稱大小

者凡掌磬鐘笙搏鼗之官俱稱師也

史

朱子曰史官名

葉少蘊氏曰古者六書皆掌於史官班固云古制書必同文不知必闕問諸故老至於衰世是非無正人用其私故子曰吾猶及史之闕文也今亡矣夫雖畧去有馬借乘之語其傳必有自矣

元按周制有太史小史內史外史御史之官柯尚遷

云太史史官之長也凡郡國計書及天文星歷皆藏於太史觀晉之韓宣子適魯見太史有易象與魯春秋是知象數赴告之書皆在太史矣其內史掌書王命又掌頒諸侯卿大夫之策命外史掌書外令掌四方之志掌三皇五帝之書掌達書名於四方則內史外史之職至繁也豈無關文哉孔子修春秋凡有關文者因魯史之舊也其亦存古道也夫

祝

朱子曰祝宗廟之官

元按周禮春官有大祝小祝喪祝甸祝詛祝其大祝
掌六祝之辭以事鬼神一曰順祝二曰年祝三曰吉
祝四曰化祝五曰瑞祝六曰筴祝鄭衆註云大祝祝
官之長也以下大夫為之左傳謂祝鮀從衛侯以盟
其亦祝官之長而大夫之職與

鞭士

鄭玄氏曰執鞭賤職

朱子曰執鞭賤者之事

元按周禮秋官條狼氏掌執鞭以趨辟王出入則八人夾道公則六人侯伯則四人子男則二人註云趨辟趨而辟除行人也又朝士掌外朝之法帥其屬而以鞭呼趨且辟註云趨朝辟行人執鞭以威之也然朝士皆以中士為之條狼氏皆以下士為之故曰執鞭之士

論語類考卷五

欽定四庫全書

論語類考卷六

明 陳士元 撰

人物考

孔子

元按史記世家孔子名丘字仲尼其先宋人父叔梁紇母顏氏以魯襄公二十二年庚戌之歲十一月庚子生魯昌平鄉聊邑生而圩頂因名曰立本姓解云

孔子之先宋之後也微子啓帝乙之元子紂之庶兄以圻內諸侯入為王卿士武王克殷封紂之子武庚於朝歌武王崩而與三叔作難周公相成王東征之乃命微子為殷後國於宋其弟曰仲思名衍或名泄嗣微子之後號微仲生宋公稽二微雖為宋公而猶以微之號自終至於稽乃稱宋公焉宋公生丁公申申生緡公共及襄公熙生弗父何及厲公方祀弗父何以下世為宋卿何生宋父周周生勝勝生正考

甫考甫生孔父嘉五世親盡別為公族故後以孔為
氏焉孔父生子木金父子木金父生畢夷畢夷生防
叔避華氏之禍而奔魯防叔生伯夏伯夏生叔梁紇
求婚顏氏女曰徵在徵在既廟見以夫之年大懼不
得有男而私禱尼丘之山以祈焉生孔子故名丘字
仲尼孔子三歲而叔梁紇卒葬於防路史云孔子四
十有九表堤眉谷竅參臂駢脇腰大十圍長九尺有
六寸時謂長人為魯司寇齊人歸女樂乃去之歷聘

諸侯莫能用也十有三年而歸于魯然後樂正禮得
乃刪詩定書繫周易作春秋以示炯戒自惟商後而
宋不足徵乃述考志追商頌以續魯故曰明王不興
天下其孰能宗予不忘宋也哀公十六年四月己丑
卒哀公誄之曰旻天不弔不憇遺一老俾屏余一人
以在位玆玆余在疚嗚呼哀哉尼父葬魯城北泗上
西漢平帝元始元年謚褒成宣尼父東漢和帝封褒
尊侯後魏文帝太和中改謚文宣尼父後周宣帝大

象二年追封鄒國公隋文帝贈先師尼父唐太宗贈先師高宗乾封二年贈太師武后封隆道公玄宗謚文宣王宋真宗加謚至聖文宣王元加封大成至聖文宣王大明嘉靖九年改稱至聖先師孔子羣賢皆改封爵稱子云

孔鯉

朱子曰鯉孔子之子伯魚也

元按家語云孔子年十九娶於宋之开官氏之女一

歲而生伯魚時魯昭公遺之鯉夫子榮君之賜因名
其子為鯉既長哀公以幣召鯉稱疾不行哀公十二
年年五十卒宋封泗水侯一統志云鯉墓在宣聖墓
東

顏路

朱子曰顏路淵之父名無繇少孔子六歲孔子始教
而受學焉

元按三氏志云顏之先出自黃帝越八世有曹姓者

始國於邾至周武王封其裔為邾子又六世而邾武公字伯顏者為魯附庸遂因武公字為顏氏後十四世皆事魯為卿大夫至為魯邑宰者即無繇之父也弟子傳云顏無繇字路顏回父父子嘗各異時事孔子家語云孔子始教於闕里而路受學焉唐贈為杞伯宋封曲阜侯

顏回

朱子曰回孔子弟子姓顏字子淵

元按潘府氏通紀云顏回父無繇為魯鄉士娶齊姜氏以昭公戊子歲十一月丙申生回弟子傳云顏回魯人字子淵少孔子三十歲年二十九而髮盡白蚤死家語云回年二十九而髮白三十二而死今較其年則顏回死時孔子六十一然伯魚年五十先孔子卒卒時孔子年七十也是回死在伯魚之前矣而顏路請車為椁子曰鯉也死有棺而無椁王肅以為伯魚未死孔子之設辭耳豈人情哉伯魚蓋死在回前

年數錯謬未可詳也孔子圍陳蔡時年六十三而回
年三十三孔子稱從我陳蔡德行顏淵則是時回尚
無恙其後孔子使子貢至楚楚王欲以書社地封孔
子令尹子西曰王之輔相有如顏回者乎則回死非
三十二歲明矣唐贈兗國公配享先聖元贈復聖公
一統志云墓在兗州府曲阜縣防山東南二十里

仲由

朱子曰由孔子弟子姓仲字子路

元按弟子傳云仲由字子路魯之卞人也少孔子九
歲子路性鄙好勇力志伉直冠雄雞佩犴豚陵暴孔
子孔子設禮稍誘子路子路後儒服委質因門人請
為弟子後仕衛為大夫孔悝之邑宰蕢蒯與孔悝作
亂石乞壺廩攻子路擊斷子路之纓子路遂結纓而
死孔子聞衛亂曰嗟乎由死矣已而果死家語云仲
由一字季路唐贈衛侯宋封河內侯改封衛公

有子

朱子曰有子孔子弟子名若

元按鄭玄云有若魯人弟子傳云有若少孔子十三
歲家語云少孔子三十三歲綱目前編於周景王八
年甲子書魯有若生是少孔子十三歲蓋從弟子傳
也門人尊有若不以字行而稱有子故後之人遂不
知其字耳孔子沒弟子以有若狀似孔子相與師之
曾子曰不可他日弟子進問有若默然無以應唐贈
卞伯宋封平陰侯潘府氏通紀云有若字子若薛應

旂氏人物考云有若字子有似無據

曾皙

朱子曰皙曾參父名點

元按弟子傳云曾蒧字皙蒧與點同乃夏后氏之裔
少康之子曲列封於鄆春秋襄公六年莒人滅鄆鄆
太子巫求屬於魯為之大夫弗聽昭公四年莒乃取
鄆巫於是改鄆為曾遂以為姓巫生阜阜生點點生
參參之子三人元申華孫西四世皆賢不仕於魯以

取郈故故點以狂自廢孔子未嘗裁之察其志也不
然則群賢侍坐孔子方探其用世之志而點獨異於
三子之撰蓋不仕於魯亡國之義然爾洪邁氏云傳
記所載曾皙待其子參不慈至謂因鉏菜誤傷瓜以
大杖擊之仆地此戰國時人妄為之辭耳曾皙與子
路冉有公西赤侍坐獨蒙吾與之褒則其賢可知有
子如參而忍擊之幾死乎孟子謂曾子養曾皙酒食
養志無擊杖仆地語也唐贈宿伯宋封萊蕪侯

曾子

朱子曰曾子孔子弟子名參字子輿

元按弟子傳云曾參南武城人字子輿少孔子四十
六歲孔子以為能通孝道故授之業作孝經十篇又
所著有曾子二卷家語云曾參字子輿博物志云曾
參字敬伯唐贈郕伯宋封郕國公配享先聖元贈宗
聖公一統志云墓在兗州府嘉祥縣南四十里

閔子騫

朱子曰閔子騫孔子弟子名損

元按弟子傳云閔損字子騫少孔子十五歲鄭玄氏云魯人容齋三筆云論語所記孔子與人語及門弟子并對其人問答皆斥其名未有稱字者雖顏冉高第亦曰回曰雍惟至閔子獨云子騫終此書無指名昔賢謂論語出於魯子有子之門人予意亦出於閔氏觀其所記閔子侍側之辭與冉有子貢子路不同可見矣韓詩外傳有孟嘗君請學於閔子之事妄甚

唐贈費侯宋加瑯琊公改封費公一統志云墓在濟南府城東五里又東昌府范縣南四十里亦有閔子騫墓

仲弓

朱子曰雍孔子弟子姓冉字仲弓

元按弟子傳云冉雍字仲弓家語云伯牛之族少孔子二十九歲鄭玄氏云魯人也子貢曰在貧如容使其臣如借不遷怒不深怨不錄舊罪是冉雍之行也

唐贈薛侯宋封下邳公改封薛公一統志云墓在兗州府曹縣東南五十里又東昌府冠縣北二十五里亦有冉雍墓未知孰是

冉伯牛

朱子曰伯牛孔子弟子姓冉名耕

元按弟子傳云冉耕字伯牛鄭玄氏云魯人孔子節小物則以伯牛侍曰吾以子自厲也唐贈魯侯宋封東平公改封鄆公一統志云墓在兗州府東平州西

一十五里又滕縣南三里與河南府孟津縣西俱有
耕墓未知孰是

丹有

朱子曰丹有孔子弟子名求

元按弟子傳云冉求字子有少孔子二十九歲鄭玄
氏云魯人子貢曰恭老慈幼不忘賓旅好學博藝省
物而勤已是冉求之行也唐封徐侯宋封彭城公改
封徐公

子貢

朱子曰子貢姓端木名賜孔子弟子

元按弟子傳云端端木賜衛人字子貢少孔子三十一
歲田常作亂憚高國鮑晏欲移兵伐魯子貢一出存魯
亂齊破吳彊晉而霸越子貢好廢舉與時轉貨質相
魯衛家累千金卒於齊唐贈黎侯宋封黎陽公改封
黎公

子夏

朱子曰子夏孔子弟子姓卜名商

元按弟子傳云卜商字子夏少孔子四十四歲孔子既沒子夏居西河教授為魏文侯師其子死哭之失明家語云子夏衛人小司馬索隱云子夏文學著於四科序詩傳易又孔子以春秋屬商又傳禮著在禮志陝西通志云郃陽縣有子夏讀書洞洪邁氏云子夏非魏文侯師也子夏少孔子四十四歲孔子卒時子夏年二十八矣是時周敬王二十一年至威烈王

二十三年魏始為侯去孔子卒時七十五年文侯為大夫二十二年而為侯又十六年而卒姑以文侯之歲計之則子夏已百三十餘歲矣方為諸侯師豈其然乎唐贈魏侯宋封河東公改封魏公

子游

朱子曰子游孔子弟子姓言名偃

元按弟子傳云言偃吳人字子游少孔子四十五歲家語云子游魯人索隱云偃仕魯為武城宰耳今吳

郡有言偃塚蓋吳人為是唐贈吳侯宋封丹陽公改封吳公

子張

朱子曰子張孔子弟子姓顓孫名師

元按弟子傳云顓孫師陳人字子張少孔子四十八歲子貢曰美功不伐貴位不喜不侮不佚不傲無告是顓孫師之行也唐贈陳伯宋封宛立侯再封陳國公陞十哲位

子賤

朱子曰子賤孔子弟子姓宓名不齊

元按家語云宓不齊字子賤少孔子三十歲弟子傳云少孔子四十九歲然宓姓當作處楚詞辨證補註云處子賤即伏羲之後顏之推家訓云兗州永郡城舊單父縣地也東有子賤碑以伏生即子賤之後史記作密不齊漢書伏虔又作服虔路史云伏羲之後有伏氏宓氏處氏密氏服氏豈五字皆可通用耶子

賤所著書有宓子十六篇唐贈單父伯宋封單父侯
公冶長

朱子曰公冶長孔子弟子

元按弟子傳云公冶長齊人字子長家語云公冶長
魯人能忍耻孔子以女妻之范甯云字子芝又左傳
釋例及路史皆云公冶氏魯公族也則當為魯人唐
贈單父宋封高宓侯博物志云公冶長墓在城陽姑
幕城東南五里墓極高一統志云墓在青州府諸城

縣西四十里

南宮适

朱子曰南宮孔子弟子居南宮名縉又名适字子容
謚敬叔孟懿子之兄也

元按論語有兩南宮适其一為武王亂臣其一為孔
子弟子史記弟子傳云南宮括字子容家語云南宮
縉鄭玄氏註檀弓云南宮縉孟僖子之子南宮閱也
又左傳昭公七年孟僖子將卒召其大夫云屬說與

何忌於夫子以事仲尼以南宮為氏杜預氏註云說
南宮敬叔也孔穎達氏云南宮氏也敬謚也叔字也
又字容又字括名說又名緡也邢昺氏云南宮子容
名緡名括又名閱夫括與适閱與說古字通用唐贈
剡伯宋封汝陽侯

樊遲

朱子曰樊遲孔子弟子名須

元按弟子傳云樊須字子遲少孔子二十六歲鄭玄

氏云齊人家語云魯人蓋樊皮之後唐贈樊伯宋封益都侯

澹臺滅明

朱子曰澹臺姓滅明名字子羽

元按弟子傳云澹臺滅明武城人字子羽少孔子三十九歲狀貌甚惡欲事孔子孔子以為材薄既已受業退而修行行不由徑非公事不見卿大夫南游至江從弟子三百人設取予去就名施乎諸侯孔子聞

之曰吾以貌取人失之子羽子貢曰貴之不喜賤之
不怒苟利於民矣廉於行已是澹臺滅明之行也漢
書云夫子既沒弟子散居四方各明夫子之道而澹
臺滅明居楚水經註云澹臺子羽齎千金璧由延津
渡河陽侯波起兩蛟夾舟子羽曰吾可以義求不可
以威劫操劍斬蛟蛟死乃投璧於河三投而輒躍乃
毀壁而去索隱云吳國東南有澹臺湖蓋其遺蹟焉
唐贈江伯宋封金鄉侯一統志云墓在鄒縣西北三

十里又開封府陳留縣北亦有臧明墓

原思

朱子曰原思孔子弟子名憲

元按弟子傳云原憲字子思鄭玄氏云魯人家語云
宋人少孔子三十六歲唐贈原伯宋封任城侯

公西華

朱子曰赤孔子弟子姓公西字子華

元按弟子傳云公西赤字子華少孔子四十二歲鄭

玄氏云魯人子貢曰齊莊而能肅志通而好禮擴相
兩君之事篤雅有節是公西赤之行也唐贈郃伯宋
封鉅野侯

漆雕開

朱子曰漆雕開孔子弟子字子若

元按弟子傳云漆雕開字子開家語云蔡人字子若
少孔子十一歲習尚書不樂仕鄭玄氏云魯人唐贈
滕伯宋封平輿侯

宰我

朱子曰宰我孔子弟子名子

元按弟子傳云宰予字子我又云宰我為臨淄大夫
與田常作亂以夷其族孔子恥之呂氏春秋亦云陳
恒攻宰予於庭然左傳無宰我與田常作亂之文是
時有闕止字子我而田闕爭寵子我為田常所殺豈
闕止之字與宰我同而後人誤引耶鄭玄氏云魯人
唐贈齊侯宋封臨淄公改封齊公一統志云墓在曲

金匱要略卷之三
第六
阜縣西南三里

申棖

朱子曰申棖弟子姓名

元按家語云申續字周而無申棖姓名鄭玄氏云申棖即申續也弟子傳云申黨字周邢曷氏云申續即申黨也蓋魯人後漢王政云有羔羊之潔無申黨之愆是以棖為黨也然唐宋從祀則作二人故山東通志云申棖字子續非申黨也唐贈魯伯宋封文登侯

一統志云封上蔡侯

司馬牛

朱子曰司馬牛孔子弟子名犁向魍之弟

元按弟子傳云司馬耕字子牛孔安國氏云宋人春秋哀公十四年六月宋向魍自曹出奔衛宋向巢來奔蓋向氏出於宋桓公之後又為桓氏世為宋司馬又為司馬氏向魍兄弟五人左師向巢次魍次子頎子車及牛不知牛與子頎等兄弟之次左傳云初宋

景公嬖向魍魎之寵害於公公將討之未及魍先謀
公請享公馬以日中為期私家甲兵之備盡往享所
公知之命皇野召左師巢與之誓共攻魍子傾馳而
告魍欲入攻公子車止之魍遂入於曹以叛又使巢
伐之曹人叛魍奔衛巢奔魯司馬牛致其邑與珪
而適齊後魍再奔齊牛又致其邑而適吳吳人惡之
而反趙簡子召之陳成子亦召之卒於魯郭門之外
阮氏葬諸丘輿唐贈向伯宋封睢陽侯

巫馬期

朱子曰巫馬姓期字孔子弟子名施

元按弟子傳云巫馬施字子旗少孔子三十歲鄭玄氏云魯人或云陳人期與子路薪於韞丘見富人處師氏而心無所慕及為單父宰戴星而出戴星而入身親其勞而治唐贈鄆伯宋封東阿侯

柴

朱子曰柴孔子弟子姓高字子羔

元按弟子傳云高柴字子羔齊人敬仲僖十代孫也
少孔子三十歲子羔長不盈五尺受業孔子孔子以
為愚鄭玄氏云子羔衛人左傳作子羔而家語則作
子高禮記又作子臯唐贈共伯宋封共城侯一統志
云墓在沂州西南一百三十里又開封府太康縣西
亦有柴墓

牢

朱子曰牢孔子弟子姓琴字子開亦字子張

元按琴牢衛人也家語載之而史記弟子傳不載莊
子謂琴張與子桑戶孟之反三人為友唐贈南陵伯
宋封平陽侯

孺悲

朱子曰孺悲魯人嘗學士喪禮於孔子

元按禮記雜記云恤由之喪哀公使孺悲之孔子學
士喪禮士喪禮於是乎書註云時人僭上士之喪禮
喪禮已廢孔子以教孺悲國人乃復書而存之是孺

悲蓋孔子弟子也而史記家語皆不入弟子之列故
朱子止稱魯人而不稱弟子豈因孔子辭以疾而絕
之耶然歌瑟使聞則固未嘗深絕之其視鳴鼓攻求
者何如而孺悲獨不以弟子稱何也

陳亢

朱子曰子禽姓陳名亢孔子弟子或曰亢子貢弟子
未知孰是

元按陳亢陳人也家語收在孔子弟子篇中而史記

弟子傳不載焉今考論語子禽兩問子貢一問伯魚
無請問孔子之事其謂子貢過恭於仲尼蓋推尊其
師也稱子貢為子稱孔子為仲尼他無此例以此推
之當為子貢弟子無疑宋封南頓侯一統志云墓在
開封府太康縣北

互鄉童子 闕黨童子

元按互鄉童子孔子與其進闕黨童子孔子使之將
命是皆得事孔子者但姓名俱無考耳

論語類考卷六

欽定四庫全書

論語類考卷七

明 陳士元 撰

人物考

堯

元按史記五帝本紀惟云帝堯不書姓氏索隱云姓伊祁氏然伊祁乃炎帝之姓蓋以堯與炎帝俱火德王故謂堯為炎帝後而漢書遂以堯為炎帝子姓伊

祁謬矣世紀云慶都寄居於伊長孺家故堯從母所居為姓靈臺碑云昔者慶都氏姓曰伊則伊其母姓豈得為堯姓乎路史云帝堯姬姓帝嚳之第二子也母陳豐氏曰慶都生堯於丹陵是曰放勳年十有三佐摯封埴受封於陶又改封於唐年十六以唐侯踐帝曰陶唐氏都於平陽安邑以火紀德在位七十載欲遜位於是四岳舉舜又三載堯已八十九歲薦舜於天以攝事一百載堯乃殂落壽一百十六歲春秋

元命苞云堯眉八采是謂通明尚書中候云帝堯即
政榮光出河龍馬銜甲世紀云堯二十登帝位厨生
翼脯階生冀英在位九十八年壽一百十八歲後世
稱為堯云夫堯乃陶唐氏之名而索隱則以堯舜禹
為謚然堯曰咨汝舜舜曰咨汝禹汝棄汝契若以為
謚則棄契垂益夔龍皆謚乎孟子云放勳乃殂落屈
原云就重華而陳辭故路史又以堯名放勳舜名重
華夫放勳者總名帝堯德業之大也重華者帝舜重

堯之華也豈可以為堯舜之名號乎鄭玄氏云堯遊
城陽而死葬焉外紀云堯葬於穀林子十人長曰監
明先死監明之子式封於劉其後有劉累事存漢紀
堯娶富宜氏生朱朱傲使出就丹堯崩舜封朱於房
為房侯謂之虞賓夏后封之唐朱之庶弟九傳鑄冀
郇櫟函高唐上唐唐杜皆其後也而御龍豕韋范隨
士劉之姓見左傳

舜

元按帝舜有虞氏姚姓其先國於虞為虞姓王符氏
姓志云舜姓虞而史伯亦稱虞幕則其上世為虞矣
書云有鰥在下曰虞舜則虞舜微時止姓虞而名舜
可知史記云舜祖句望出於顓頊非也予嘗著荒史
有辨矣風俗通云舜祖幕左傳云舜祭幕路史云虞
幕生喬牛喬牛生瞽叟是虞幕為舜祖而舜姓虞也
綱目前編云堯即位四十有一載甲申舜生於諸馮
索隱云舜母曰握登蘇氏古史云舜生於諸馮之姚

墟故為姚姓居於為汭故為為姓金履祥氏云諸馮
為汭皆在今河東縣孟子以舜生諸馮為東夷之人
蓋對文王西夷而言猶云東方西方耳故曰地之相
去千有餘里蓋自河中至岐周千餘里也而說者指
齊之歷山濮之雷夏為舜耕漁之地或又指會稽上
虞牛羊村百官渡為舜所居其謬殊甚舜本虞帝之
名一徙成市再徙成都萬章云謀蓋都君而皇甫謐
遂以都君為舜之字路史云目瞳重曜故曰舜而字

曰重華世紀云因瞳子名重華春秋演孔圖云舜目
四瞳謂之重明尸子與淮南子皆云舜兩瞳子是為
重明羅苹氏云目動曰舜與瞬同諸說皆非也堯舜
禹字義古無定註廣雅云堯暎也鄭玄氏禮記註云
舜克也玉篇云禹舒也或云堯遜也舜運也禹舉也
餘冬錄云舜准也循也禹輔也湯攘也又謚法云翼
善傳聖曰堯仁聖盛明曰舜受禪成功曰禹此皆後
人臆說耳舜年三十為百揆三十三攝天子事六十

而堯崩服堯三年喪即天子位在位四十八載而崩
於鳴條壽一百十歲三妃娥皇盲無子女英生義均
及季釐義均封於商是為商均季釐封於緡次妃癸
比氏生二女曰宵明曰燭光是為湘神庶子七人而
圭胡負遂廬蒲衛甄潘饒番傅鄒息其何母轅餘姚
上虞濮陽餘虞西虞無錫巴陵衡山長沙皆其裔也

禹

元按夏后姒姓名禹一曰伯禹又曰大禹索隱以禹

為謚史記以文命為名或以文命為字薛應旂氏
云禹字高密蓋據世紀之說皆非也前已辨矣路史
云禹之先出於顓頊顓頊生駱明駱明生白馬生是
為伯翳字熙汶山廣柔人也封於崇故曰崇伯舜過
之羽山三年而死初翳納有莘氏曰志是為修己生
禹於燹道之石紐鄉長於西羗西夷之人也三十娶
塗山氏綱目前編云堯在位七十有二載乙卯舜使
禹平水土八十有一載甲子封於有夏舜在位三十

有二載丁巳命禹總師戊午敘洪範九疇四十有八
載甲戌舜崩乙亥禹避於陽城丙子禹即位在位八
歲崩於會稽年百有六歲以金紀德故又稱白帝禮
緯含文嘉云禹甲宮室垂意於溝洫百穀用成神龍
至靈龜服尚書璇璣鈐云禹開龍門導積石玄圭出
刻曰延喜鬻子云禹飯一饋而七起世紀云禹手足
胼胝故世傳禹病偏枯足不相過至今巫稱禹步馬
禹廟謚議云禹桀皆後世易名周人革民視聽故以

行為謚乃謚夏之末王為桀而追謚其始祖為禹也
豈其然哉

稷

元按稷名棄周本紀云其母有邠氏女曰姜嫄為帝
嚳元妃姜嫄出野見巨人跡踐之有孕居期生子以
為不祥棄之隘巷林中寒冰皆有異遂收養焉初欲
棄之因名曰棄及為成人好耕農堯舉為農師天下
得其利舜封之於邠號曰后稷別姓姬氏路史云棄

字曰度辰勤百穀而死於黑水之山娶姑生黎璽世
為后稷周禮大司徒註云棄為堯稷官立稼穡死配
稷名為田正詩人謂之田祖履跡之異則前賢辨之
悉矣

臯陶

元按路史云少昊之裔子取顓頊氏之女曰修生大
業大業取少典氏之女曰華生陶陶生而馬喙漁於
雷澤帝舜以為士師陶一振褐而不仁者遠乃立犴

獄造科律聽獄執中而天下無寃封之於臯是曰臯
陶舜禪禹禹遜之陶辭焉卒於臯橐宇記云六安北
有臯陶冢夏本紀云帝禹立而舉臯陶薦之且授政
焉而臯陶卒封臯陶之後於英六或在許又左傳文
公五年秋楚仲歸滅六冬公子燮滅蓼滅文仲曰臯
陶庭堅不祀杜預氏註云臯陶字庭堅羅泌氏云臯
陶乃少昊之後而庭堅則高辛氏之子六乃臯陶之
後而蓼則庭堅之後也預既誤以庭堅為臯陶字復

金匱要略卷之七
以蓼為臯陶後失之矣蓋臯陶之後有舒蓼而非蓼也舒蓼偃姓而蓼則姬姓蓼滅而舒蓼猶存至宣公八年舒蓼始滅臯陶之裔世為理官其後逃難伊墟為李氏是為聃之祖

舜臣五人

朱子曰五人禹稷契臯陶伯益

元按舜有臣五人禹稷臯陶三人解見於前茲考契益二人路史云契帝嚳之子帝嚳次妃有娥氏曰簡

狄感飢致胎醜而生契聰明而仁堯命為司徒使布
五教封於商賜姓子氏商人謂之玄王詩稱天命玄
鳥降而生商毛傳以飢降為祀郊禱之候而史遷乃
有吞踐之說蘇洵氏辨之詳矣至於伯益之世系則
史傳不同路史云顓頊娶鄒屠氏生禹之祖及八凱
伯益八凱之一也字隤欽為唐澤虞是為百虫將軍
佐禹治水封於梁舜禪禹禹遜於益辭焉年過二百
歲史記秦本紀云帝顓頊之裔孫曰女修生子大業

大業娶少典之子曰女華生大費與禹平水土已成
禹曰非予能成亦大費為輔帝曰咨爾費贊禹功其
賜爾阜苻爾後嗣將大出乃妻以姚女佐禹調鳥獸
鳥獸馴服是為柏翳賜姓嬴氏索隱云此秦趙之祖
一名柏翳尚書謂之益世本漢書謂之伯益觀史記
上下諸文柏翳與伯益是一人無疑羅泌氏則云柏
翳者少昊之後皐陶之子而伯益乃顓頊之第三子
劉秀表亦云夏禹治水伯益與柏翳主驅禽獸是翳

益為二人金履祥氏云秦紀謂柏翳佐禹治水馴服
鳥獸即尚書所謂隨山刊木暨益奏庶鮮食益作朕
虞若予上下鳥獸者也唐虞功臣獨四岳不名其餘
未有無名者豈有柏翳之功如此而尚書不概見乎
泌之好異要非事實也

羿

朱子曰羿有窮之君善射

羅泌氏曰夷羿有窮氏窮國之侯也偃姓左臂修而

善射五歲得法於山中傳楚狐父之道又學射於吉甫以善射著嘗從吳賀北游見雀馬賀命射左目羿中厥右恥之由是每進妙中高出天下迨事夏王夏太康滔淫無度畋于有洛之表十旬不反羿因民弗忍兵於河以距之太康失邦仲康立于時羲和沈湎于酒叛官離次將羿是與王命胤侯征之羿遽隱慝及相之立爰遜相而自立因夏民代夏政自鉏遷於窮石滅樂正后夔之子伯封於是益恃射不修民事

而蔽於從禽武羅伯困熊髡龐圍皆賢臣也乃棄之
而信任伯明氏之讒子寒浞又以龐門為受教之臣
浞乃蒸取羿室純狐謀殺羿而虞羿於畋羿弗察也
八年歸自畋龐門取桃梧殺之

元按尚書稱大康尸位乃盤遊無度畋于有洛之表
十旬弗反有窮后羿因民弗忍距于河窮國名也羿
居窮石之地故以窮為國號孔安國註尚書云羿諸
侯名杜預註左傳云羿有窮君之號又說文云羿帝

嚳射官也賈逵云羿之先祖世為先王射官故帝嚳
賜羿弓矢使司射又堯之臣有羿亦善射是羿乃善
射之稱非人名也左傳襄公四年魏絳云昔有夏之
方衰也后羿自鉏遷於窮石因夏民以代夏政註云
禹孫太康淫於失國夏人立其弟仲康仲康卒子相
立羿遂伐相號曰有窮孔穎達云羿廢太康而立其
弟仲康及后相既立羿代夏政則羿必自立為天子
逐出后相后相依斟灌斟尋夏祚未滅蓋與羿並稱

王也及寒浞殺羿因羿室而生澆澆已長自能用兵始滅后相相死之後始生少康少康生杼杼又年長能誘豷始得滅浞而立少康自太康失邦至少康紹國當有百載據此則夏亂甚矣而夏本紀云仲康崩子相立相崩子少康立不言羿浞之事是遷之踈也

冢

朱子曰冢春秋傳作澆浞之子也後為夏少康所誅羅泌氏曰寒浞者猗姓寒君伯明氏之讒子弟也寒

君惡之棄諸窮窮羿收之立以為相而信使之羿遂
后相自立而荒遊泥乃蒸羿室已而殺羿襲其號且
因其室生澆及豷澆恃力盪舟走陸是曰梟泥任
詐偽而不德於民使澆帥師滅斟灌斟尋氏處澆於
過處豷於戈殺夏后相爰革夏命四十有三年為伯
靡所殺

元按左傳魏絳云泥因羿室生澆及豷恃其讒慝詐
偽而不德于民使澆用師滅斟灌及斟尋氏處澆於

過處殪於戈夏臣靡自有禹氏叔二國之燼以滅況
而立少康少康滅澆於過后杼滅豷於戈有窮遂亡
又哀公元年伍員云昔有過澆設斟灌以伐斟尋滅
夏后相后緡方娠逃出自竇歸於有仍生少康焉為
仍之牧正菘澆能戒之澆使其臣椒求之逃奔有虞
為之庖正以脫其害虞思妻以二姚邑諸綸有田一
成有衆一旅能布其德而兆其謀以收夏衆撫其官
職於是少康使其臣女艾謀澆使其子季杼誘豷遂

滅過戈復禹之績祀夏配天不失舊物夫澆與豷皆
泥之子澆國於過豷國於戈而澆獨以力稱屈原云
澆身被服疆圉是也

湯

元按商湯子姓契之後商本紀云天乙立是為成湯
自契至湯十四代凡八遷湯始居亳放桀於南巢歸
于亳踐天子位號曰商自盤庚遷殷張晏云禹湯皆
字也謚法云除殘去虐曰湯然湯名履書云予小子

履是也孔安國云湯初名天乙為王時改名履譙周云夏殷之禮生稱王死稱廟主皆以帝名配之天亦帝也殷人尊湯故曰天乙又易曰帝乙歸妹易傳亦以帝乙為湯名是天乙即帝乙也若然紂之父亦曰帝乙是祖孫同名矣商王多以十干取名湯之父曰主癸主癸之父曰主壬主壬之父曰報丙報丙之父曰報乙湯之後王又有祖乙有小乙有武乙然則帝乙為湯名豈待後世稱廟主而始有帝乙之名哉又

湯亦稱武王詩云武王載旆毛傳云武王湯也又尚書璇璣鈴云湯受金符帝錄白狼銜鈞世紀云湯有聖德諸侯不義者湯從而征之一時歸者三十六國踐位十三年壽百歲卒葬亳北之濟陰

伊尹

朱子曰伊尹湯之相也

元按呂氏春秋云有仇氏女採得嬰兒於空桑後居伊水命曰伊尹尹正也謂湯使之正天下也皇甫謐

氏云伊尹力牧之後生於空桑空桑地名史記云伊
尹名阿衡阿衡欲干湯而無由乃為有莘媵臣負鼎
俎以滋味說湯致於王道或云伊尹從湯言素王及
九主之事今觀尚書所載尹豈有是哉竹書紀年云
伊尹壽百二十歲路史云伊姓出於炎帝下及湯代
有伊摯為之左相是為保衡孫子兵書伊尹名摯孔
安國氏亦云伊摯而國名紀又有伊國註云伊摯所
尹也則伊又為地名而非姓矣英賢傳以伊尹為空

桑氏尤妄外紀太乙氏之後有空桑氏然空桑之地
有二其一在兗于寶記云徵在生孔子於空桑之地
孔廟禮器碑云顏育空桑是也其一在華陝之間共
工氏振洪水以薄空桑伊尹生於空桑是也故地記
謂陳留有伊尹村伊尹卒大霧三日至太戊時其子
伊陟為相一統志云伊尹墓在開封府歸德州城東
南四十里又河南府偃師縣西亦有伊尹墓

高宗

孔安國氏曰高宗殷之中興王武丁也

元按商本紀云帝武丁帝小乙之子也武丁修政行
德殷道復興在位五十九祀武丁崩子祖庚嗣立武
丁之廟為高宗作殷武樂章以頌之禮記喪服四制
云高宗者武丁武丁者殷之賢王也繼世即位而慈
良於喪當此之時殷衰而復興禮廢而復起故善之
善之故載之書中而高之故謂之高宗

老彭

包咸氏曰老彭殷賢大夫

元按邢昺氏云老彭即莊子所謂彭祖上及有虞下及五霸者也李善氏云彭祖名鏗堯臣封於彭城歷虞夏至商年七百歲故以久壽稱世本云彭祖姓錢名鏗在商為守藏吏在周為柱下史年八百歲又宰我問五帝德篇云堯舉舜彭祖而任之崔靈恩氏云彭祖堯臣仕殷世其人甫壽七百年王符氏潜夫論云顓帝師于老彭壽千餘歲此皆以老彭為一人也

王弼氏云老是老聃彭是彭祖羅泌氏云祝融之裔
陸終之子曰錢字鏗封於彭是為彭祖以斟雉養性
事放勳歷夏商守官大夫商王采女受術錢始去之
終身不見壽七百六十七歲臯陶之裔恩成之胄世
為理官以理命氏至紂時逃難伊墟為李氏其五世
孫名乾字元杲為周上御史胎則且眇娶洪氏曰嬰
敷感飛星娠十二年謫左而生偃周宣王之四十二
年二月望日也偃之始生其母名之玄祿是為伯陽

甫生而皓首故謂老子耳七十而參漏故名耳而字
儋儋與聃同左傳所謂太史儋是也邑於苦之賴鄉
賴即萊也故又曰老萊子以三十六法治心理性究
忠盡孝桓莊世柱下史簡靈世守藏吏孔子嘗學禮
焉孔沒十九年而儋入秦西歷流沙八十餘土化胡
成佛壽四百有四十歲據其說則老彭為二人孔子
稱其述而不作信而好古彭祖雖無考而老子則有
明證楊中立氏云老子五千言以自然為宗謂之不

作可也朱子亦云以曾子問中老聃言禮數段證之
可見述而不作信而好古蓋聃周之史官掌國之典
籍三皇五帝之書如五千言亦或古有是語而老子
傳之未可知也故列子引黃帝書與老子谷神不死
章相同楊慎氏云佛經三教論謂五千文者容成所
說老為尹談蓋述而不作也又莊子引容成氏曰除
日無歲無外無內則容成氏固有書矣述而不作此
其明證

周任

馬融氏曰古之良史

元按千姓編云周任商太史家語云晉人規宋章子曰周任有言曰民悅其愛者弗可敵又左傳昭公三年仲尼謂周任有言曰為政者不賞私勞不罰私怨夫孔子屢引周任之格言則周任為古之賢人可知路史亦云商有周任而邢昺氏乃以周任為周大夫非是

紂

邢昺氏曰紂名辛字受商末世之王也

馮猗氏曰紂謚也殘義損善曰紂

元按尚書稱商王受史記殷本紀云帝乙崩子辛立是為帝辛天下謂之紂紂資辨捷疾聞見甚敏才力過人手格猛獸又帝王世紀云紂倒曳九牛撫梁易柱而秦誓舉紂之罪更不言其絕力也曰沈湎冒色敢行暴虐曰穢德彭聞曰罪浮于桀又甚則稱之為

讎稱之為獨夫今觀史鑑所載淫虐之行天下之惡何加焉而子貢乃謂紂之不善不如是之甚何也竊疑周書之過其實也希烏有言文王拘羑里武王羈玉門呂氏春秋云季歷困死文王苦之不忘羑里之醜至武王事之亦不忘玉門之辱羅泌氏云文王見辱玉門顏色不變而武王卒擒紂於牧野釋諒闇而即戎載木主而示述武王於紂蓋有怨辭焉豈謂泰誓耶孔子云武未盡善子貢云紂惡未甚其意將以

儆戒於君臣之際而蘇氏遂以武王非聖人吁非所以論世矣

微子

朱子曰微子紂庶兄

元按微子啓家語及路史皆作魏子啓史記云微子開者殷帝乙首子而紂之庶兄也紂旣立不明淫亂於政微子數諫不聽乃問於太師少師遂亡然尚書作微子啓而史記作微子開者避漢景帝諱也食采

於微故曰微子呂氏春秋云紂母生微子與仲衍其
時尚為妾改而為妻生紂紂父欲立微子啓為太子
太史據法而爭曰有妻之子不可立妾之子故立紂
為後史記云啓母賤辛母正后是二母也若謂啓辛
同母則妻從夫貴而所生之子亦從而貴啓不得稱
嫡長子乎此呂氏之謬也論語謂微子去之未嘗明
言其何往而孔安國氏乃有奔周之說左傳又有面
縛銜璧衰絰輿襯之說史記又有持祭器造於軍門

肉袒面縛膝行而前之說真厚誣微子也羅泌王柏
金履祥輩皆有辨矣一統志云墓在歸德州西南一
十二里

箕子

朱子曰箕子紂諸父

元按宋世家云箕子紂親戚也紂為淫泆箕子諫不
聽乃被髮狎狂而為奴遂隱而鼓琴以自悲是為箕
子操世家以箕子為紂之親戚未嘗言其為父為兄

鄭玄王肅皆云紂之諸父朱子集註從之而服虔杜預則又以為紂之庶兄其說不同如此箕子名無考惟司馬彪註莊子云箕子名胥餘不知何據

比干

朱子曰比干紂諸父

元按宋世家云王子比干者紂之親戚直言諫紂紂怒殺之剗其心家語亦云比干是紂之親而馬融以比干為紂之諸父微子為庶兄然孟子云以紂為兄

之子且以為君而有微子啓王子比干是微子比干
皆諸父矣夫孟子以微子比干並稱微子之為紂庶
兄確乎有明徵也而比干豈得為諸父哉故金履祥
謂孟子所謂兄之子者兄當作乙謂均是帝乙之子
也言一時一家而善惡之相遠也若然則比干非紂
諸父乃庶兄矣一統志云墓在衛輝府城北一十里
即武王所封者題曰殷太師比干之墓又河南府偃
師縣西北亦有比干墓

文王

元按文王姬姓名昌太王之孫季歷之子也上世出於后稷至公劉立國於豳亶父自豳遷岐改號曰周周本紀云季歷卒子昌立是為西北崇侯虎譖於紂囚之羑里乃演易闔天之徒求有莘氏美女及文馬以獻紂紂赦西伯賜弓矢斧鉞使專征伐於是伐犬戎伐密須而都於程又伐耆伐邶伐崇乃作豐邑遷都於豐年九十七而崩謚為文王史遷云西伯陰行

善豈文王以服事殷之心哉

武王

元按武王名發西伯昌之子也昌娶於有莘氏曰太姒生十子長曰伯邑考早卒次曰發發生於帝乙之二十三祀壬辰西伯薨子發嗣為西伯乃伐紂踐天子位七年而崩墓在京兆長安東杜禮記文王世子篇文王謂武王曰我百爾九十吾與爾三焉文王九十七乃終武王九十三而終且如其言則文王十五

而生武王前此已有伯邑考矣武王八十一而生成
王後此又生唐叔虞焉此理所無者蓋戴記之附會
也竹書紀年云武王年五十四而卒似為近理

周公

元按周文公名旦文王第三子武王之弟也采於周
故稱周公文其謚也周在岐下國名紀云黃帝時有
周昌商有周任是周國久矣自太王遷岐而竹書東
漢書及孔叢子俱稱周公季歷是王季亦嘗稱周公

也杜預氏云扶風雍東北有周城蓋即周原岐之小地名而太王所遷之岐則在美陽之南故漢書及說文俱謂文王封岐在美陽中水鄉蓋即周公之采邑故譙周氏云以太王所居之周地為周公采邑是也周公長子伯禽成王封之魯次凡伯次伯齡封於蔣男爵次靖淵封於邢侯爵次祭事文王受商之命次昨次茅故路史云凡蔣邢茅昨祭皆周公之裔也史記云周公既卒成王葬之於畢從文王明子小子不

敢臣周公而一統志以周公墓在伯禽墓南似誤

亂臣十人

朱子曰馬氏以十人為周公旦召公奭太公望畢公榮公大顛閎夭散宜生南宮适其一人謂丈母劉侍讀以為子無臣母之義蓋邑姜也

元按尚書秦誓篇云予有亂臣十人同心同德孔安國註十人與馬融孔穎達鄭玄之說皆同故邢昺氏云十人自周公旦以下先儒相傳為此說也君奭篇

云惟文王尚克修和有夏亦惟有若虢叔有若閔天
有若散宜生有若大顛有若南宮括註云虢叔文王
之弟也至武王時虢叔死矣故十臣之中無虢叔也
周公已解見於前召公名奭亦與周同姓譙周氏云
周之支族食邑於召謂之召公索隱云召畿內采地
文王受命取岐周故墟周召二地分爵二公故詩有
周召二南言在岐山之陽也召公封於燕亦如周公
以元子就封而自留以相王召公次子代為召公至

宣王時召康叔虎其後也世家云召公治西方其得
兆民和召公卒民思其政作甘棠之詩太公望呂尚
也齊世家云呂尚東海上人其先祖嘗為四嶽佐禹
平水土有功虞夏之際封於呂本姓姜氏從其封姓
故曰呂尚呂尚蓋嘗困窮年老矣釣于渭西伯將出
獵卜之曰所獲非龍非虜非虎非羆所獲霸王之輔
於是西伯獵果遇太公於渭陽與語大悅曰自吾太
公望子久矣故號之曰太公望載與俱歸立為師劉

向別錄云師之尚之父之故曰師尚父孫子兵法云
周之興也呂牙在殷譙周云姓姜名牙索隱云名尚
字牙師尚父其官名也武王已平商封師尚父於齊
營丘金石錄云太公壽一百四十歲畢公名高馬融
氏云畢公文王庶子姓書云畢公文王少子魏世家
云武王伐紂而高封於畢其苗裔曰畢萬乃魏之祖
也杜預氏云畢在長安縣西北括地志云畢原在雍
州萬年縣西南周本紀云武王命畢公釋百姓之囚

表商容之閭路史云周公薨畢公高入職焉蓋高食采於畢入為天子公卿也畢命篇云命畢公保釐東郊又云以周公之事往哉又稱為父師是畢公代周公父師之職治陝以東之郊也榮公名無考榮亦國名路史以榮為姬姓之國蓋亦食采於榮而入為公卿者厲王三十年以榮公為卿用事蓋其後也大顛閔天散宜生大閔散宜皆姓顛天生皆名周本紀云西伯文王善養老大顛閔天散宜生鬻子辛甲之徒

皆往歸之又云紂囚西伯於羑里閼夭之徒求有莘氏美女驪戎之文馬以獻紂又云武王伐紂散宜生大顛閼夭皆執劍以衛武王又云武王命閼夭封比干之墓是也南宮适亦姓名即八士中之伯适周本紀云武王命南宮适散鹿臺之財發鉅橋之粟國語晉胥云文王之即位度於閼夭而謀於南宮重之以周召畢榮韋昭註云南宮即南宮适也邑姜武王妃太公呂望之女張師曾氏云邑姜亦婦人之有聖德

者

八士

元按馬融鄭玄皆以周之八士為成王時人劉向以
為宣王時人朱子集註兩存之且曰不可考矣然以
為成王時人者近之汲冢周書克殷解云乃命南宮
忽振鹿臺之粟乃命南宮伯達與史佚遷九鼎蓋南
宮忽即仲忽南宮伯達即伯達尚書所謂南宮适即
伯适也又宣和博古圖云武王時有南宮仲蓋即仲

突仲忽也是八士者皆南宮氏也國語云文王詢於
八虞賈唐氏云周八士皆嘗為虞官又周書武寤解
云尹氏八士太師三公咸作有績又和寤解云王乃
屬翼於尹氏八士註云八士武王賢臣也唐蕭穎士
遊蒙山詩云子尚捐俗紛季隨躡遐軌丹鉛續錄云
蒙山之季隨即周八士中一人也然季隨隱於蒙山
事別無出雍大記云八士墓在咸陽縣東北五十里

秦伯

朱子曰太王三子長泰伯次仲雍次季歷太王之時
商道寢衰而周日彊大季歷又生子昌有聖德太王
因有翦商之志而泰伯不從太王遂欲傳位季歷以
及昌泰伯知之乃與仲雍逃之荆蠻

羅泌氏曰古公太王避狄居岐娶於駘曰太姜生泰
伯仲雍季歷季歷居程古公屬焉泰伯窺知及弟仲
雍竄於荆蠻居梅里荆人義而君之號為吳泰伯伯
卒仲繼剪髮文身裸以從俗是為虞仲武王封其曾

孫仲於夏墟亦曰虞仲

元按吳世家云季歷賢而有聖子昌太王欲立季歷
以及昌於是秦伯仲雍二人乃奔荆蠻以避季歷季
歷果立是為王季而昌為文王左傳僖公五年宮之
奇云秦伯不從是以不嗣故朱子亦云太王翦商而
秦伯不從若然則周為強暴之諸侯取商之計已非
一世而文王以服事殷又何謂也詩云居岐之陽寔
始翦商者蓋太王本無翦商之志而居岐之時始得

民心王業之成寔基於此故詩人追原武王之所以
翦商其先業寔始於太王耳豈太王有翦商之志哉
然泰伯所以必逃之荆蠻者蓋泰伯為長子序當傳
國而太王或欲傳國於季歷故泰伯逃以遜國也然
孔子不曰三以國讓而曰以天下讓者蓋伯泰逃之
荆蠻從而歸者千餘家立為吳君則其賢可知使傳
國位必能大其世業况商之天下至紂必絕縱無武
王伐之紂能終有天下乎使泰伯不逃而有後焉則

國位傳於秦伯之後秦伯之後見紂無道亦必伐之
不必武王也是周之天下乃商之天下商之天下必
歸於周乃秦伯之後之天下非季歷之後之天下也
故孔子論武王得天下乃追探為秦伯所讓蓋人知
秦伯讓國而不知讓天下故曰無得而稱焉夫秦伯
與仲虞俱逃使仲雍不逃則國位亦當傳及仲雍矣
而孔子不稱仲雍為至德惟以為逸民者豈讓國之
心出於秦伯而仲雍從兄以逃於國位無繫耶

虞仲

朱子曰虞仲即仲雍與泰伯同竄荆蠻者

元按吳世家云泰伯弟仲雍皆周太王之子而季歷之兄也季歷賢而有聖子昌太王欲立季歷以及昌於是泰伯仲雍二人乃奔荆蠻為吳泰伯卒無子弟仲雍立是為吳仲雍武王克殷求泰伯仲雍之後封周章於吳封周章弟虞仲於周之北是為虞仲索隱云左傳稱泰伯虞仲太王之昭則虞仲是太王之子

而周章之弟亦稱虞仲者蓋周章之弟字仲始封於
虞故曰虞仲其仲雍本字仲而為吳之始祖後世亦
稱虞仲所以祖與孫同號也

夷逸

元按先儒謂夷逸姓名無考或者以為虞仲隱於夷
故稱虞仲夷逸金履祥云夷逸當自是一人但不知
姓名故號夷逸耳薛應旂云夷氏逸名夷詭諸之裔
也族人夷仲年為齊大夫夷射姑為邾大夫獨逸隱

居不仕或勸之逸曰吾譬則牛也寧服軛以耕于野
豈忍被繡入廟而為犧乎是夷逸非虞仲明矣

伯夷 叔齊

朱子曰伯夷叔齊孤竹君之二子

羅泌氏路史曰怡姜姓也禹有天下封怡以紹烈山
是為墨台成湯之初析封離支是為孤竹西伯之興
有允及致老矣而歸之未至西伯薨武王急伐商叩
諫不及義棄周祿北之止陽上俾摩子難之逮聞淑

媛之言遂摘薇終焉是為伯夷叔齊先是齊嫡而夷長父初欲立夷不可初薨夷齊偕異去之北海之瀕於是憑立世其國定王十一年入于齊

元按韓詩外傳云夷齊父名初字子朝孔叢子註云夷齊墨台初之二子也允字公信智字公達是叔齊名字不同又烈士傳云夷齊之弟憑字伯僚然憑乃孤竹君之中子夷之弟非齊之弟也金履祥氏云古無名字之例蓋緯書之附會耳宋元符三年封伯夷

為清惠侯叔齊為仁惠侯

論語類考卷七